

19 OCT 1998

Lim-Pemimpin

LIM ANGGAP ESTRADA DAN HABIBIE "ORANG BARU"

KUALA LUMPUR, 19 Okt (Bernama) -- Gerakan menganggap kenyataan Presiden Filipina Joseph Estrada dan Presiden Indonesia B.J. Habibie yang membela Datuk Seri Anwar Ibrahim sebagai kenyataan "orang baru" yang belum banyak pengalaman sebagai pemimpin.

Presiden parti Datuk Seri Dr Lim Keng Yaik berkata kenyataan Estrada dan Habibie berkaitan bekas Timbalan Perdana Menteri Malaysia itu jelas menunjukkan bahawa kedua-dua mereka cetek pengalaman dalam membuat kenyataan yang menyangkut urusan dalaman negara lain.

Bercakap kepada pemberita pada majlis rumah terbuka Deepavali parti Gerakan di Menara PGRM di sini, beliau berkata Malaysia memandang berat kenyataan kedua-dua pemimpin negara Asean itu mengenai isu Anwar yang jelas mencampuri urusan dalaman negara ini.

"Mereka seolah-olah menggunakan isu Anwar untuk menutup masalah yang melanda negara mereka sendiri," katanya.

Estrada dan Habibie dalam satu kenyataan bersama baru-baru ini mengkritik cara kerajaan Malaysia mengendalikan kes Anwar dan menganggap penahanan Anwar sebagai melanggar hak asasi manusia.

Lim berkata kenyataan itu walaupun dianggap bersifat peribadi tetapi ini jelas menunjukkan bahawa kedua-dua mereka tidak mempunyai pengalaman menangani dasar antarabangsa terutama dalam soal tidak mencampuri kedaulatan negara lain.

Katanya Estrada dan Habibie sebaliknya hendaklah belajar daripada pengalaman 17 tahun Perdana Menteri Datuk Seri Dr Mahathir Mohamad menerajui Malaysia dan mengendalikan isu antarabangsa.

-- BERNAMA

AKT AKD